

陽春縣志卷之十

人物

有一鄉之善士有一國之善士有天下之善士士不得志於時僅以善行稱於鄉土之不幸也然由是不至與草木同腐亦未嘗非士之幸也世未有見惡於鄉人而稱道於當世者則鄉曲之譽寧不足貴哉吾邑自宋以來代有聞人謝仲坑觀察以謝青天稱於湘劉榮玠太守以劉父母稱於浙譚敬昭農部以粵東三子嶺南七子稱於粵羅升培太守以羅青天稱於浙其尤著者也其他磊落英多之士孝弟力田睦婣任卹之行所在多有舊志稱為砥行立名方軌前哲十室之邑大有人在信矣茲編於舊志之所收採訪之所及悉著於篇不敢以愛憎為棄取穢史之誚庶幾免焉此則予之可告無罪者耳

宋

卷十

一

韋君載

元

梁國傑

明

崔士暉

莫尚俊

莫璵

林桂

徐洪

吳紀

劉廷亮

梁棟

汪瑛

嚴儀

賴麒

賴玉德

謝詔

何萬邦

汪雲梓

謝銑

伍聚奎

胡秉忠

梁崇伯

張所學

陳諫

楊鳳鳴

梁應材

羅光岳

謝良垣

馮仕琦

何謙

伍賢

黃裳

謝鑣

楊鳳翔

歐陽念

梁之屏

黃守誼

汪萬垓

謝鏗

謝鑛

梁燧

張宏位

謝之棟

劉裔灼

清

劉裔烱

楊 巽

謝 梓

曾嗣宗

李 素

陳炳璿

謝茂松

謝良遇

梁 燿

汪騰龍

汪元藻

劉啓銘

陳 覺

譚文耀

黃守琨

李雲標

劉大鏡

楊公俊

劉啓鎰

李潤林

柯 一 林

胡國俊

敖宜廣

謝 棻

黃勳圻

謝 棧

劉家壩

張 鑑

劉家坡

梁 埠

謝宏濟

敖 臨

黃仁虬

吳尚澄

梁 鉞

梁文淮

嚴朝傑

梁曰鑿

謝仲圻

李惟揚

林聞譽

梁作文

王獻猷

謝成惠

吳 廷

劉啓鋌

譚元陽

麥夢蓮

劉啓鈞

王定祿

卷十

二

黎大元

黃于相

吳昌儀

李家翰

李家裕

嚴鵬翔

謝衛生

柯克岐

劉宗注

劉宗瀨

柯亭卓

吳愈登

劉宗遂

謝光天

范丕和

何朝端

劉士人

劉世探

劉世栩

劉世馨

劉榮玠

譚敬昭

羅升楛

劉承軒

劉榮琪

吳以受

莫蒼榮

莫蒼稜

吳垣豐

王俊聲

邱成章

王俊魁

陳討榮

伍學桐

袁昌樞

范昌鑑

張光榮

顏有莊

劉承輦

陳守衷

李樹勳

張贊犖

劉士鉞

鄒作華

李 嶽

敖雍鳴

劉顯楫

劉德璨

范建熙

魯殿顏

劉德瑄

劉顯楨

劉士疇

曾超賢

曾傳甲

李 泮

陳存元

林德驥

崔振勳

宋

韋君載字厚元質穎向學聞廣州多名儒乃往從師擇友學成而歸登淳熙進士權廣南路提舉鹽茶嘗奏減官賣鹽及增收鹽勛錢商民稱便行業文章一時推重今祀鄉賢

元

梁國傑有材畧兩任鄰封不私故舊累官昭勇大將軍沿海招討使威令嚴明士卒用命海寇逃跡今祀鄉賢子奎蔭為安陸州吏目歷遷奉訓大夫知南恩州轉朝列大夫

明

崔士暉順陽都人積學善屬文洪武中邑令梁潛邑丞吳子育皆留意作士見士暉文器之尋以永樂戊子舉於鄉潛為撰題名記同時莫尚俊思良都人莫璵南廂都人並以明經膺永樂癸卯鄉薦與士

卷十

三

暉俱祀鄉賢

林桂太平都人宏治七年流賊犯境桂分兵截擊之斃賊一十九人賊衆潰亂救出被擄者百餘人既而暗自巡邏猝遇賊奮戰死本道陶魯遣官致祭焉

徐洪為小旗宏治十五年十二月十六夜賊犯城洪與總旗胡玉協力射賊以鈎刀殺賊甚衆賊乃退民以保全既而洪復追捕賊猝中暗鎗死聞者惜之

吳紀南廂義民宏治十五年十二月十六夜賊犯城居民避於西門樓紀會總旗方仁奮力擊賊退之保全男婦無算

劉廷亮號枕岡其先閩人僑寓陽春遂籍焉憤猺賊披猖與伍林黃姓者捐貲赴廣西招狼兵剿平之諸里排以猺所踞民間荒田姦與狼兵自耕而食防守汎地即以劉伍林黃世為招主猺患以息至康

熙四年撤去招主悉歸保長然其功不可沒也

按是役也劉伍林黃並有功桑梓而舊志於劉則書名餘則書姓豈當時傳聞異辭故畧之耶今世遠年湮益難稽攷惟邑之伍氏宗譜載其祖伍經綸與廷亮捐貲募兵剿平猺寇事與此同然則志所稱伍姓者殆即經綸歟噫文獻闕而一介義士並姓名湮沒弗彰者多矣伍林黃諸人猶得以姓傳不可謂非幸也

梁棟下馬水人正德間歲貢生講學不受脩脯安貧不履公庭由教諭遷壽府審理十餘年謝官歸囊如懸磬年八十考終殮無衾榔鄉人稱嘆之祀鄉賢

汪漢城南人歲貢生幼喪父事母克孝友族弟捐金為之畢姻時西山弗靖二司舉為叅贊有平寇功初授泰州州判陞福山令門無暮夜之金民有倉箱之慶獨修邑志百廢俱舉祀鄉賢

卷十

四

嚴儀有謀畧嘉靖三年討賊親擒賊首械解軍門八年奉檄募兵三百截捕又獲賊首任元周三龐飛雲李把界等二十七名蓋屢立戰功云

賴麒城西門外人由歲貢授金華府訓導陞龍泉教諭請復勳臣崇祀之典賻助同僚蕭愷之喪致仕歸里絕跡公門故人梁棟父子三喪皆為之殯邑人義之呈靖大吏於嘉靖辛酉題祀鄉賢至萬歷甲申知縣黃憲清奉文清查出之然迄今人猶景仰也

賴玉德謝詔俱千長嘉靖三十一年流賊劫高明知縣謝復生以奉委調兵廉知玉德詔俱勇敢乃督令流兵往捕兩人奮不顧身皆為賊害

何萬邦太平都人嘉靖三十一年流寇劫陽春江萬邦借兵擊之奮勇直前遂亡於陣

汪雲梓邑諸生萬歷四年倭賊劫陽江被圍甚急值久雨城多頽壞先是梓計誘倭人三十餘徒養之於家至是得所招倭人擊賊圍遂解

謝誥字步川輪水人由歲貢生任江西寧州同知幼孤與兄介川相依式好為州貳恬淡謙謹開誠先物約已裕用有少年坐賭博誥憐之戒令肄業竟登第以廉能轉靖江審理歸而睦族和里孝友性成終身一轍

謝氏族譜載誥任江西義寧州參軍陞江南常州府審理

伍聚奎字星宇太平都人萬歷二十四年歲貢任歸州州判慷慨任事御下精明吏不能欺民不敢犯上官倚任焉聚奎知無不言故能為百姓興利除害卓有政聲去後人思其德

胡秉忠字葵台邑城人萬歷己酉鄉薦任江南六安州牧威信明敏慷慨任事政暇以興賢作士為務安俗素健訟秉忠泣任豪猾屏跡

卷十

五

州人稱治歸家建宗祠贍鄰族資實興卷鄉里稱焉

梁崇伯字譚勳端謹和平與物無競自新會徙居陽春事母色養並隆母死營葬躬土木之役斷巨木為斧所傷身墮木下忽若有拔之起者卒無恙蓋孝思所感子應材成進士崇伯愈謙抑日與素交載酒放談今古不與聞局外事當世名流咸重其品崇祀鄉賢

張所學字彥博邑城人由貢生任廣州府訓導日與諸生講明性理之學陞連州學正州故僻陋所學多方訓迪風俗翕然興起嚴氣正性模範足多云

陳諫字冲元亘古亨人貢生任江西安義令攻苦茹淡勤於民事時縣里甲遞年供役練悉遣歸農前官催征苛迫民多逃竄練加意招徠俾復業以休致歸

楊鳳鳴字詡圭邑城人萬歷壬子舉人好學能文工詞賦著作甚富

經兵燹散佚為人倜儻喜談兵時流寇騷擾當道方督師撲剿鳴鳳率子弟壯丁偵知賊形勢指授方畧擒賊首吳馬如雪夜之入蔡州也其平寇詩至今傳誦之

梁應材號石邑城人萬歷壬子舉於鄉天啓壬戌成進士初授江西進賢令進賢為豫章劇邑應材以寬簡臨之而政無不理以艱去起補蕪湖令甫下車進父老於庭問興革利病乃興學宮疏泮源繕隄堰申保甲由是文物蔚興奸宄潛息兩攝關篆稅課外不問羨餘一切陋規悉除之以治最擢駕部主事尋遷吏部員外郎益清慎自矢及歸杜門不出鼎革後屬家人但呼曰阿翁後二十年卒壽七十二羅光岳南鄉都澗水人由歲貢歷任雲南三泊令三泊地近滇多佛刹光岳至以清淨為治本有盜誣陷良善富民多受害為辨白而釋之問民疾苦革火耗清徭役去無名之徵開陂池之利受其惠者誦

卷十

六

德不休云

謝良垣輪水人由歲貢任曲江訓導性恬淡寬和廉介自勵課生徒隨事規戒悉心訓導多所裁成庠序中有抱屈者力為申雪其人固未嘗請也士仰之如山斗

馮仕琦字華宸邑城人萬歷戊午舉人官四川雙流令性方嚴却苞苴修學校治豪猾塞弊竇興廢墜民多雜派浮費悉為請豁及歸囊無長物少時與兄仕瓊讀書西河龍巖菴至是仍課子姪於其地日與二三知己賦詩娛志焉

何謙字抱虛萬歷間由歲貢任江西樂平丞處心寬恕政無苛擾民供析薪謙嘆曰丞何功而受此耶樂平習俗獷悍謙嚴什伍之法奸不能容後以病歸惠政多端民深感戀

伍賢太平都人以崩石莊田產捐為學田縣尹熊烈記其事同時有

黃裳者字尚禮亦太平都人捐山口莊田歸學皆有功於黌序者
謝鏞字天閑輪水人歲貢生警敏軼羣潛心理學名重鄉邑顧秉性
曠達不汲汲於功名淡泊寡營而好周人急為祖祠設嘗田崇祀事
惇宗睦族井井有條子孫世守之不變

楊鳳翔字超凡邑城人崇禎元年歲貢生初任福建崇安縣丞秩滿
報最陞山東東平州州同時大旱民自相食任是地者多畏蕙鳳翔
單車到官撫恤備至鄆城縣令缺鳳翔奉檄署篆調劑上下間軍民
倚之若父母解組歸囊橐蕭然卒年七十五

歐陽念太學生邑城人崇禎五年流寇迫城念率鄉勇與賊戰生擒
賊首蕭阿四邑人賴之

梁之屏字翰生邑城人少積學為學使者器重由歲貢授羅定訓導
轉廣西來賓教諭飭躬講學士類尊之嘗捐俸修學宮苴蒨盤空儵

卷十

七

然自樂也晚年居家敦厚樂易與物無競稱有道長者焉

黃守誼字紀依八甲人由歲貢授福建古田訓導闢學舍立文社課
士如家塾子弟不問束脯捐俸倡修學宮扶振風教古田人士翕然
歸之賦性慧直與人落落難合遇縣令有阿私不平事輒切諍之坐
是取忌棄官歸十餘年足不履公庭明未授國子監學正著有燕京
興五華風韻荔枝集年七十三卒

汪萬垓號水西邑城人崇禎乙亥歲貢生純厚端嚴勤學好問為鄉
里祭酒善誨人及門多掇科第者生平無誑言不與外事雅好吟咏
日與親故唱和稱韻事焉卒七十五

謝鏜字天聲輪水人崇禎庚午舉人志行卓越以古人自期再上春
官不第即希蹤高隱和陶淵明歸去來辭以見志穿池引泉栽竹灌
花日以課子姪為事不入城市者二十餘年卒年六十六

謝鑛字天治輪水人崇禎壬午舉人幼嗜學以經術名里中好獎引士類登科後惟設帳講業敝衣藜藿不厭出遊郊外邑人不知為薦紳也性耿直遇世變寇至大罵不屈遂被害年七十八

梁燧字真傳邑城人歲貢生資性端凝篤志於學奉父母問膳請衽愉色和氣先意承志人無間言能文章壯志未酬識者惜之

張宏位字素之邑城人由邑庠入為國子生任承天府通判魁奇磊落鯁介不阿每出語地方事直言無隱凡可為闔邑計安全者無不殫力圖之

謝之棟字凝之輪水人性敏絕過目成誦經史百家靡不淹貫卓然抱命世才鯁介孤峭不隨流俗惟念闔邑利弊日以役繁賦重為憂為文獨出機杼崇禎壬午鄉試之棟文奇甚初擬元後改置副榜第一以薦授兵部司務未竟其用知者惜焉

卷十

八

劉裔灼字嗣華號東園三甲人由明經任信宜教諭事親色養並隆迨失怙恃友二弟益篤讀書恥秦漢以下卓有大志年六十領青氈時兵荒學廢裔灼捐俸重修申訓多士信宜文風始振嘗語諸生曰學人縮頭角好脂韋如衾影何泣任三年歸里著述人稱東園先生後值滄桑為偽賊所困正色厲拒賊不敢害土寇逞毒鄉鄰毅然請兵高州勦平之周恤孤寡猶其餘事後昆科名濟美咸謂盛德之報

云

清

劉裔烱字嗣昭號綺園太平都人甫成童有聲庠序順治庚子舉孝廉篤內行明大義吳逆陷粵聞其名欲強以職堅拒之困之囚圖弗變也康熙己巳授山東濟陽令廉潔慈愛以弭盜興學為己任有古循良風顧性耽林泉效東坡和陶詩以見志未幾謝病歸濟陽人為

繪圖作頌家居絕迹城市課子多成立鄉閭有大舉詣門請靡不立斷丁丑歲歉傾貲以賑存活甚衆性嗜學淹貫羣書前邑志多出其手著有述古家訓及賞奇軒集行於世

楊巽字占淳邑城人其先山東武城人洪武間始祖義以軍功起家世襲陽春所千戶巽少有大志好謀畧明季四方盜起紳士推為團練征西山與齋公諸賊戰著有奇績當事上其能使襲祖職加授都司仍保守鄉里時有偽伯羅成耀統叛兵圍春州城幾破巽率家丁死士數百開關迎戰死於城下賊亦大創遁去城賴以安巽繼妻朱氏矢志撫孤語在列女傳時人謂夫烈婦節兩足欽云

謝梓南鄉都輪水人生員英燦之子孝廉鏜之孫也年十六翻寇劫輪水其母蘇氏被難梓在塾讀書聞之號泣追十餘里願以身代賊感之釋其母而繫梓去鄰邑宰孫廷鐸聞其孝捐俸贖之歸然傷重

卷十

九

矣數月死

曾嗣宗字子述號雲亭為諸生慷慨有大志順治丁亥土寇兇擁圍邑城僻遠無援衆束手無措嗣宗毅然曰如蒼生何子身詣肇慶請軍適帥遠出西粵復并力馳赴高州詣帥請帥疑之嗣宗涕泣願械綆以從如虛甘戮帥感之移師至賊奔潰邑賴以安

李素有義氣膂力過人充邑練巡護勤勞值小醜掠輪水寨素屬鄰練挺身赴救遇賊竟日獨戰負數十創而死輪水人感而誄之聞其事者亦贈詩以為俠烈倡

陳炳璿字瑞御巨古亨人博雅好古為諸生以醇謹自守名貢成均恬淡不仕人有過耳不欲聞惟就其善者獎成之僮僕有違不加鞭扑微以意諭戒而已暮年杜門謝客吟咏自樂鄉人重之

謝茂松字麗昂明經鑣之子增廣生性純孝事親務得歡心與兄晉

昂建宗祠置嘗田以崇祭祀端方率物里人比之王彥方讀書淹貫暮年猶手不釋卷義方訓子庭除肅穆屬纊時猶諄諄以睦族親鄰囑其子棫云

謝良遇字君明南鄉都輪水人也幼穎敏學行醇謹由歲貢任清遠訓導毅然以勸學興文為己任訓迪有方士信從之偶與當事忤嘆曰偃蹇一羶何為也拂衣歸餐糲茹蔬怡然自得

梁燿號壇山吏部應材子也穎異嗜學持己謙沖順治甲午歲貢以雙親年高不肯謁選侍疾弗離左右飲食藥餌必親調劑以進父母惜其勞令少息弗忍去也居喪絕粒哀毀苦塊三年未嘗稍易愛慕其至性過人如此

汪騰龍字致雨質直和平義之所在慷慨施與族有婚喪不能舉者贈之貲里人有艱苦者矜而恤之暮年携家隱居石菴嗜善弗倦順

卷十

十

治十二年御史張給善人匾獎焉從輿論也

汪元藻號巖叟城南人順治丁酉歲貢性至孝早失怙事祖母梁得其歡心撫育幼弟友愛彌篤少而力學試輒冠軍教授生徒者幾三十年為人坦白不能隨人意曲折廉介自守正直不阿邑宰咸敬之劉啓銘字湯衡曰新其號也三甲人貢生幼失怙事母以孝聞待弟以友著邑宰顏其堂曰式好篤嗜儒術立鄉塾延師教小子貧者給以肄業資多所成就接人以禮好施與賑饑卹寒修橋施榼未仕卒於家康熙六十年崇祀鄉賢子宗泮邑廩生砥礪廉隅保童子應試剔除時蔽而資其困乏僉謂有父風云

陳覺字益潤邑城人庠生性至孝母歿號慟逾常自既殯至終喪悉遵古禮己酉赴鄉試先試期一日聞其父凶問奔而歸哀毀尤甚學博陳世蓮延為座上賓重其行且將朝夕解慰之覺固辭不獲仍衰

經不去身閱五月竟以哀傷卒年三十二無子

譚文耀字西崖邑城人賦性淳謹口無妄言自新會來卜居與君子敦古處聞人善則殷然勸勉聞人惡則俛若不聞事母純孝母喪營葬不假工匠至十指血出不知苦也愛讀書晚耽山水策杖尋幽有詩云堪嘲白首西崖老八十東山屐未休實錄也孫子芳舉孝廉黃守琨字德聲一字敬軒太平都人邑諸生通經史有才畧時土寇猖獗里無安堵守琨捐金築石堡寨與鄉族同居八甲為春州邊境與高郡枕界鞭長莫及伏莽易滋守琨周覽形勢請於憲司立那黃鵝公二汛至今賴之居家以孝友聞修祖祠置嘗產立族規以為世守子仁虬自有傳

李雲標字成玉號擎柱岡尾人庠生少卓穎善屬文居家以孝友稱豁達慷慨交遊悉當時名宿遠邇推服焉晚耽山水嗜吟咏高致不

卷十

十一

在青蓮下

劉大鏡字若水號澹菴三甲人少有文名嘗語人曰吾輩淹貫子史當見之實用豈徒效蠹魚生活耶事親孺慕弗衰縣令楊良為文表之為諸生慷慨有志畧時土寇蕭猶中流毒村莊大鏡率鄉勇捍禦龍灣一寨獨無恙蒼黃中民艱於食推解活之莊歲舉明經北上與海內名公遊歸益嗜學前輯邑志多咨訪焉晚病目至八旬雙眸自開因別號重明亦奇徵云

楊公俊字丕顛號應山陽春千戶巽之子也巽以軍功累遷都督同知卒於難語在本傳巽歿時公俊年甫十齡辟踊哀毀如成人自是遇家祭必泫然泣事繼母撫弱弟創宗祠家塾孝友敦睦出於性生尤負經濟才達時事康熙初軍興旁午夫役浩繁俊獨倡照稅均攤之議使雜務派歸米斗夫役派歸烟丁縣白其議於當事報可人無

偏累民力以甦康熙辛未歲饑出粟平糶與同志捐金建尊經閣及飛雲樓俊弱冠補弟子員四十二歲膺歲薦著有我聞軒稿年五十二卒遠近嘆喟孫祖燾樂善好施如其大父

劉啓鎰字荆衡號玉峯三甲人由太學生考授州同康熙四十一年邑潦橋圯啓鎰捐貲修建雍正四年穀貴捐三百石以賑建義塾於鄉來學者貧寒廩之赴試贖之恤佃免租憫貧施櫬悉行以終身鄉賢啓銘其兄也時有二難之目子宗湘由舉人官刑部員外郎孫世槐貢生皆慷慨樂施克承先志

李潤林字悅生號陶岡未冠遊於庠錚錚有聲性耿介為諸生三十餘年未嘗私謁長吏課生徒以孝友廉謹為典型章句其末也晚年鍵戶著有四書詩經要領性理錄蘇文箋藏於家康熙壬午歲薦督學臧大受稱為嶺表文豪名未達部而終士林惋之

卷十

十一

柯一林字翰選號冷村邑城人弱冠工詩文為名諸生以明經司教瀧州捐修學宮勤於課士以母憂去州士為之立碑旋補廉州訓導不赴怡情書史絕迹公庭課子弄孫晏如也處戚黨間耿介不阿為文高潔兼通岐黃識古彝器書畫卒年七十四

胡國俊字傑士號瓊石歲貢生文譽早著壯歲由新會來居春州學士翕然就問今薦紳前輩多出其門

敖宜廣字餘軒號槐圃邑城人其先陽江人康熙元年徙陽春宜廣性至孝失怙恃時年甫十二哀毀如成人既葬拮据營家計撫其八歲弟宜翔比成立推產分贍之創置嘗田歲時供祀無匱與人交恂謹厚遇橫逆常避不與校閭左有睚眦者赴廬相質一言立解性好施予康熙丁丑大饑捐米以賑邑令李以好義可風綽楔表其行焉

謝某字振彥祖孝廉鑛父映溟相繼逝某年十四家徒壁立奉母鞠弟不以貧故少嗇親卒營葬剪荆榛蠲土石上下山麓間不自知其勞勤也捐置嘗租與弟機同修祀事友愛終身性好施有問以子孫計者曰若曹果鍵戶讀書率祖攸行美莊豈過是乎子有光陽江籍歲貢以光及孫能拱登賢書參光餽於庠

黃勦圻字允猷號靈溪邑庠生所居曰扶民堡春江交界地也嶺險峻行旅苦之勦圻捐貲修砌其路高峒邨所經之水造石橋以利涉賴及兩邑癸巳歲饑出粟平糶不足復捐金市陽江穀以資接濟鄉鄰歸美之勦圻謝曰吾方愧不能兼濟而敢自以為德乎可以風矣謝棧字巍夫號蒙溪茂松子邑庠生博覽羣書雅工吟咏建義學歲延師教族中子弟之秀者捐田租三百石為師生膏火費其他平糶焚券惠及桑梓不可枚舉怡情山水風致翛然年四十三卒著有西

卷十

十二

園遺集

劉家壩字怡士號靄齋裔烱子國學生考授州同謹厚無妄言時邑紳衿多抗逋劉為望族家壩以身率衆額欠糧銀甫開徵即先完納人為鼓舞好施與而不濫有雙澹千總何振先者雲南人母老不能迎養壩助以百金振先死亦家壩實賻之而歸其櫬康熙卒丑雍正丙午皆年饑倡義賑濟全活各萬人八人啓鐔歲貢啓鈺武舉人張鑑字子慎號借堂邑城人三歲而孤十八歲補弟子員久之貢成均年五十三矣越四年喪母哀毀中禮好學深思書義有纖悉疑必求析乃已秉鐸信宜設皋比於官舍四載問業者無虛日信宜科第聯翩鑑之力也解組歸紳士為之伐石年七十四手輯文藝刪補四書大全評選唐詩丹鉛無倦謂子若孫曰若好為之是爾曹之恆產也邑名士多出其門至今論文行者輒曰劉家坡張鑑云

劉家坡字峨士號芸齋裔核子弱冠補弟子員以歲貢生任瓊山訓導生平慕邱文莊海忠介為人績學淵涵褻躬剛正事父與嫡母愉色柔聲溫清無間生母亦如之兄弟八人終身式好其司訓瓊山也精心啓迪經其講授為文詞皆有法度捐俸修文廟在任二年卒諸生縑經徒步千里歸其喪者十二人生平多善舉葺宗祠修族譜捐穀賑歉為尤足稱伯兄家竣亦秉鐸封川蓋世濟其美云

梁焯字真儼號遯菴邑城人吏部應材猶子也性諄謹圭角盡化有汪汪千頃風初進武庠棄之旋入文庠好古書號淹博兄燧亦以文望豪一時燧以高明焯以沈潛時有兄夷弟專之目年十四失怙善事母兄弟五人友于無間建祠修譜捐租充嘗稱敦睦焉晚領歲薦愛冠溪山水奇勝卜築與五子同居顏其材曰翕村

謝宏濟字皇任號西峯大醮岡人家貧好學父萬祥年九十餘宏濟

卷十

十四

色養備至養方訓子善誘初學受業者多所成就子惠成別有傳孫祖錫並官廣文餘皆庠士宏濟壽躋八旬夫婦齊眉疊膺封典人以為積善之報

敖臨字亦簡號敬菴邑城人少勇俠不拘小節康熙末年粵東多盜有梁二伯者虎踞西水灣肆出剽掠電白營將陳奉檄進勦與臨謀臨潛身夜入賦營猝縛之以獻旋至西山誘盜首陳冬瓜出而殺之時新興之甕洞盜首李黑三聚眾數千旁邑騷動制府楊榜示有能平盜者予以官臨率鄉壯士直搗其巢殲之甕洞平除電白把總總督孔奇其勇畧復除虎門千總命領左翼鎮標兵千往征番禺市橋海盜臨環海數十戰生擒渠魁毛豬等四十餘名斬馘無算擢廣海守備先是廣海盜陳大樂嘯聚百峯山臨至即領兵四面環擊之賊大潰殺者擒者不下三百餘名百峯寧謐臨料敵多中謀定後戰平

時撫馭以道及摧鋒陷陣身先士卒出其技勇銳不可當故所向克捷居官三十年歷任叅副未嘗稍改素風年六十以覲入京卒於道子泰辛酉選拔

黃仁虬字行符號健菴守琨子庠生弱齡兩遭寇變避亂西寧事父母溫清如常日八甲多盜仁虬訟除之里中稱孝義其設立學田鼓舞後昆請撤櫃徵嘉惠桑梓懿行尤卓守琨捐築石寨請立那黃鵝公二汛仁虬實佐其議縣令王以繼述濟美徵其門子庠生朝賡克體先志

吳尚澄字如登靜溪其號貢生慷慨好施尤周恤寒士歿時自薦紳至野老咸嗟惜之輓詩哀然成集序之者莊中丞有恭衛少廷尉廷璞也尚澄能詩學嶺南三大家而得其趣著有松園遺草子昌儼亦貢生好義急公有乃父風邑令向顏其門曰善行裕後蓋不誣云

卷十

十五

梁弑字兼最國學生出嗣叔父塏事所後母至孝歿而廬墓三年居本生母鄧氏喪幾不欲生出多金助其兄若弟為喪葬費辭不受弑長跪泣曰若然是使不孝覲面目以食息人間矣兄若弟亦泣感其意受之旁觀交相嘆息性慷慨好周人急建祖祠立族規生平無片牘入公門乾隆四年饑悉力捐賑一鄉賴以存活焉

梁文淮字宣泗號竹溪邑城人貢生祖英德教諭陞父候選州同士館文淮讀書不屑章句操行不襲虛聲婉容愉色以事雙親排難解紛以處梓里焚券贖孤施棺散藥乾隆七年穀價騰貴出穀千石白當事設法平糶撫軍王縣令董並給匾旌其風子振幹貢生克繼父志

嚴朝傑字柱臣增廣生父萬孚動循古禮朝傑少遵庭訓讀書植品非公事不謁縣庭性克孝父病藥餌必親嘗執親喪三年不入內有

業儒者以貧故將輟業朝傑貽金曲成之乾隆七年饑捐資以賑鄰里歿而薦紳先生重其行徵詩輓之

梁曰鑿邑城人歲貢生官惠來訓導恬淡沖和讀書至老猶日手一編常扃戶教子孫安貧樂道聚順一堂怡然也

謝仲坑字孔六號耳溪輪水人性穎異品學深純為惠學使士奇所得士雍正癸卯解元丁未登明通榜初任長寧教諭陞授湖南平江令甫下車首興學校折獄多所平反案無留牘時有謝青天之日遷荊州府通判奉檄清釐兩湖大獄二百餘案涇渭立分無枉無縱隨以歸州盜案堅不會印事直聲達於朝引見擢常德府同知歷任長沙寶慶永州襄陽宜昌衡州常德七府知府護理衡永郴桂道駙鹽長寶道所至有政聲居官三十餘年解組日貧如故令平江時嘗撰句云縱有饋遺都却去更無情面可求來其廉介可知也著有楚南

卷十

十六

紀畧山餘堂詩集耳溪藁行世祀鄉賢

李惟揚字修光號崧臺李堡人少英毅才兼文武春夏讀書秋冬射獵始應武試輒冠其軍康熙辛卯領解壬申舉武進士第二人及第點榜眼授侍衛惕勵勤勞屢邀上眷嘉獎詔在滿洲圍場行走隨乞假省親有白金之賜假滿授狼山遊擊雍正朝擢涿州參將入覲賜賚稠疊陞浙閩督標中軍副將調福建延平城守副將累遷廣東左右翼鎮總兵官賞戴花翎乾隆初遇覃恩蔭一子再赴闕改福建澎湖水師副將兢兢晚節旋引退惟揚宣力中外三十載八徙官兩移重鎮身際昇平挽弧射雕沒金飲羽之技無所用其巧惟於三朝眷遇優隆足以見其為人晚年工吟咏著有崧臺集子十二人長伯豪武進士次伯傑從二品蔭生次伯桓伯康俱武舉餘諸子暨孫多庠

士

林聞譽字體仁號靜山生而穎異日誦數千言髫齡通經書左史大旨為文章一準先正尤長詩賦童試時宋太守試以七題日未晡七藝成就有金馬玉堂之目庚子膺鄉薦辛丑捷南宮癸卯除保定令治績卓異引見陞知霸州兼攝南北兩岸河員解組後兩袖清風娛情詩酒手註唐人試帖三卷自著花笑軒詩文集十餘卷排律二卷雜著十餘卷其門人為之付梓

梁作文字有造一字網菴南鄉都附城人乾隆庚午由廩貢生試京兆中副榜考充官學教習繼登癸酉賢書授國子監學正丁丑成進士授河南項城知縣治項四載政尚寬簡訟庭常虛公餘與都人士談藝尤矜恤寒畯更建蓮溪書院按月課士多方獎勵之己卯七月飛蝗過境蔽空作文齋沐禱於神蝗遂去不為害辛巳秋河決直注項之澱河澱北村落盡汨時作文方臥病蹶然起親率吏民於澱河

卷十

十七

南岸星夜築堤澱南賴以全活者萬家顧勞憊愈篤未幾卒宦囊蕭然項人捐資賻之並建祠蓮溪書院祀焉

王獻猷字約軒城西人家貧力學謙恭端肅有古儒者風由拔貢官浙江山陰縣丞廉介自持時有富民被誣獻猷奉檄鞠訊得實立釋之富民感德餽以金力却不受後改遂溪教諭家徒四壁泊如也著有約軒詩集

謝惠成字恩煜號恕菴思良都人宏濟長子少篤志博物弱冠為名諸生旋食餼陳學使惠華奇其文延校試卷雍正乙卯膺選拔就職監州旋充正藍旗官學教習既而改就廣文以親老便迎養也歷任英德三水教諭署翁源樂昌學博訓士務敦實行多所陶成生平捐修祖祠倡置嘗產里族中婚喪無力者飲以金而自奉特儉歷官十餘年服御常如寒素子祖錫庚辰鄉薦仕浙江太平令次鳴皋餼於

庠

吳廷字政鈇號榮州七甲石碧人太學生剛毅性成家修自勵生平不瑣瑣治生產輕財好施周急賑饑力行無德色尤具謀畧明大義遇事排解艱鉅不辭里族遠近倚賴焉

劉啓鋌字肇兼號和軒家坡仲子歲貢生天資高邁博覽羣書工吟咏為文力追唐宋弱冠樹幟膠庠以經義見賞於王督學安國首拔之持身謙謹喜愠不形好獎引善類排難解紛一坐立間身容必肅其素性然也壬申隨父宦瓊山遭大故哀毀幾隕其生友于日益篤戊寅邑饑啓鋌倡議捐穀以賑又先自裹飯為糗親給饑者於道存活甚衆邑令姜山以仁里可風旌其門性恬靜寡營杜門教子姪弗輟輯有經義博說詩文詞賦選等書年七十三卒

譚元陽字啓瞻號懋齋城西人讀書一覽成誦髫年通五經工書法

卷十

十八

試輒冠軍鄉闈七薦不售以歲貢授樂昌訓導講學談經士咸折服居常孝友狷介家貧而不苟取嘗拾遺金於道遣人伺其主歸之遺金者以半報堅謝弗受鄉有訴子於官者婉為排解諭以孝慈父子感泣去晚年生子敬昭人謂為厚德之報年七十七卒於官

麥夢蓮字錫君單寮人歲貢生父常彩赤貧而喜教子讀夢蓮幼就傅瑞雲書院數日輒携米給之夢蓮必預市餅以進父歸送里許乃返益攻苦積學邑侯朱公夜過書院聞書聲琅琅達旦召見器重之弱冠補博士弟子員娛親友弟使父母若忘其貧者授徒不計脩脯首以倫理誨人娓娓無倦恬淡樂易蓬室蕭然子稼軒舉明經劉啓鈺字肇調州同家壩第五子也性敏年十五以六經補弟子員居常事親不離左右躬自服勤絕不假手僕御遭親喪雖既虞哀至輒慟遇親之所嗜必悲哽不能食時稱劉孝子

王定祿字士昌六甲人賦性醇厚濟人利物無德色有古樸風六甲兵農雜處定祿倡分保甲而盜靖蕙茅墾稅田數百畝常為土惡毀圳絕其灌溉定祿竭力出資為里人營水利田以有秋敬宗修睦鄉族德焉

黎大元字敦善邑增生古龍村人幼耽經史潛心性理之學蓬蒿滿徑晏如也篤孝友年近六旬色養不衰兄弟間毫無忤色其教人以敦本為要文律準諸先正見有志之士獎掖務使有成恬淡端和望而知為有道之士

黃于相字佐憲八甲上黃洞人幼失怙恃家徒壁立鬻蔬以奉養繼母愉色婉容里稱其孝晚年家稍贏餘其兄困乏于相竭力周護不以異居而或弛其情且視猶子如己子焉

吳昌儀字恭禮八甲松園鄉人六歲失恃十歲失怙事繼母竭力承

卷十

十九

順甚得歡心奉庶母如禮且篤天顯伯仲訢訢人稱式好里閭推為保正善者獎勸之不善者督責之數年而盜息歿後堡內紳耆嗟惜不已云

李家翰字德豪潭水堡人孝友夙敦以歲貢歷署清遠增城學博甚得士心生平好施無吝嘉慶己巳潭水墟北門頭火延燒數十家家翰捐金周恤癸亥大饑復竭貲倡賑施粥二十餘日野無餓莩梭羅陂荆山逕川途交險多溺躓之虞家翰倡建石橋并夷逕路數里崎嶇遂平如砥與人謀事開誠布公為邑士推重若修建

文廟書院諸鉅工靡弗咨之任之而家翰必竭心力以始終之即今修志亦其一端也稿甫就而家翰卒年七十二

李家裕字德颺號廣庭潭水堡人由例貢生授州司馬胸坦易無城府常靜坐寡言事母孝謹奉庶母亦如之仲弟病篤未有嗣裕泣禱

願減算以代季弟庶出少弱愛護彌至樂施與潭水埠頭木橋當衡
易圯家裕倡捐斃石行者使之乾隆戊申福春圍火遭燬者百餘家
逾年又火嘉慶己未本埠北門頭亦災家裕暨堂兄家祥家翰疊捐
資以恤癸亥春亢旱人饑復與家翰捐米八十餘石倡施糜粥全活
甚衆又置田畝囑其子才璨等世世為施棺助殮費其歿也聞者為
之隕涕

嚴鵬翔字興邦國子生松栢鄉人性剛直勇於赴義見人有過面折
之又教訓之遇鄉族鬭訟必委曲勸諭使之冰釋或酬以金堅不受
乾隆丁卯修學宮及文塔鵬翔董其役四載任勞未嘗自詡
謝衛生輪水人世業儒衛生學尤苦而艱於過年四十始補博士弟
子員家壁立事母孝常舌耕以供菽水温清定省禮節罔虧中歲後
孺慕彌篤性耿介蔬食菜羹恬然自得也卒年逾六十

卷十

二十

柯克岐字子芳邑城人庚午副貢元吉之子也性純孝竭力事親父
歿母失明且久病克岐夫婦年逾五旬數月交待寢側衣不解帶毀
瘠雖形不知也生平鮮嗜慾寡言語安貧守分世利不營蓋篤行君
子云子士伯歲貢生

劉宗注字聚文三甲人貢生温厚好施不形德色族子有游惰者責
諭之而資以業本雖强悍輩莫不德而敬之乾隆戊寅歲饑宗注倡
捐賑濟全活多人辛巳三甲墟災復捐錢卹助屬續時惟諄諄以善
遺訓子世楹等倡修祠宇砌築橋路猶有父風皆宗注貽謀之善云
劉宗瀛字聿觀號青嶽三甲礪溪人乾隆庚寅舉人少穎悟十歲通
詩文詞賦號神童年十三受知劉文宗星煒有天生英物之譽既又
為翁方綱督學所器重將拔以優行旋舉賢書官化州學正家居輯
四書精義經學指要以訓後進著青嶽制義藏於家其天分既優學

力亦邃述多可稱云

柯亭卓字子石號介巖邑城人幼慧過目成誦淹貫經史兼通術數之學既乃壹志六經為古文瓣香韓蘇制義則力追歸胡粹然正軌年十四游庠由甲午副貢領庚子鄉薦甲辰試春闈入彀見抑南旋後病足家居教授十餘年從之遊者咸以老斲輪目之

吳愈登字肇科一字鹿峰石碧鄉人性端嚴好施與乾隆己酉其鄉河子巖災燬茆房二十餘舍愈登給其食復其居越歲鄰鄉三分田災周恤亦如之生平嗜古能文年十五補弟子員四十膺歲薦晚益肩讀不休士林重其品學

劉宗遂字翰圃郡庠生劉啓鏐冢子也貌魁梧以品學為士林推重鄉薦後課徒三十年從之遊者靡不稱其和粹家纂貧事八旬父母友同懷弟四人雞豚籩豆間藹藹怡怡儼若素封者乙卯挑授知縣

卷十

一一

改就校官歷任合浦欽州揭陽諸學所至執經請業無虛日以身為教薰陶之益為多云年七十九卒於揭陽官署

謝光天字立選一字麗齋城西人性友恭家產久析恆以租息所入分贍其兄年逾七旬以歲薦任潮州司訓在任十餘載和平廉介潮士德之

范丕和字醇士一字厚菴龐洞人性孝友恆以善勸人嗜學不倦年登耄耄猶手不釋卷嘗修家譜建祠宇著有詩經彙錄六卷通鑑綱目輯要九卷課讀逾三十年安貧知命屢空晏如遇族黨有事喻以情理咸心折焉由庠生辛酉欽賜副榜甲子又賜舉人

以上舊錄志

何朝端城西人乾隆甲戌明通進士居家以孝友稱任海康東安縣教諭啓迪後進成就者衆

劉士人字達成號志仁鄉賢啓銘之曾孫也甫冠遊庠文名噪甚內

行尤醇篤侍母疾數年不離左右友愛其弟士品備至然性剛正訓子弟尤嚴里閭服其教化亦無敢越理鬪爭者里前有大溪歲築長橋以濟行人家雖貧弗輟長子榮珩恩貢生文行兼優貧無宿糧藉館穀以養親諸弟均賴裁成焉季子榮玠自有傳

劉世探字步雲號蟾階裔灼元孫至性天生孝於父母嘉慶庚申舉人任連州學正歷任始興香山教諭文行為士林矜式邑侯陸向榮聘修縣志

劉世栩號醒吾孝廉宗渡第三子嘉慶戊寅舉人任大埔教諭兼精武技北上會試與武舉十餘人偕道經大庾嶺遇盜衆武舉皆退縮世栩獨與角盜盡披靡由是名震遠邇僉稱其文武兼優云

劉世馨字德培號薌谷一號眉翁裔灼元孫幼失怙受母謝氏訓善屬文兼工吟咏為李雨村學使首取士携赴任所校閱偕登羊城五

卷十

一一一

層樓賦詩以青字為韻馨詩有江水西浮羚峽白海山東走虎門青之句李學使激賞之以優貢就教職奉母就養克盡孝道任雷州教授時值制軍飭府丈屯田安插投誠海寇闔郡驚擾馨代雷守作屯田議稟復事得寢雷人德之馨詩長於古體端州彭泰來選入端人集工書法畫墨蘭尤卓絕子士犖邑廩生有父風

劉榮玠字介佩一字錫亭晚號南屏鄉賢啓銘元孫由二甲進士出宰浙江歷任知縣同知俸滿保陞知府三署府缺兩充鄉闈內監試及司襄校居官二十餘年一以經術飾吏治初任孝豐時訪訟棍置之法訟獄寢息凶年設法賑濟邑無飢民調樂清縣久於其任命盜案隨到隨結威濟以恩劇盜改行邑中婦人向多健訟至是澆風盡革捐廉濬白沙河道溉田千頃民稱為劉公河政聲播於全浙以卓異赴都引見樂清人士送行詩有一清飲得雙溪水七載裁成滿縣

花之句由乍浦同知調署嘉興府篆剔除宿弊清釐積案平反泰順大獄其移守嚴州也請卹水災捐施糜粥惠澤嘖嘖人口復倡修文廟與書院麗澤堂又修七里灘嚴子陵祠堂解組後郡民即書院與祠內奉祀祿位時帥中丞承瀛有劉守為循吏之稱朱學使詠蘭有公正廉明無愧劉父母名之譽居官日郵寄廉俸歸里創舉闔邑賓興又立家族文會增置祖先墓田其為德於鄉族又如此玠性穎悟安貧力學博涉經史諸子為文寢饋古大家與同邑譚敬昭齊名稱一時瑜亮晚年著有以約堂文藁重訂左傳紀事本末藏於家歿後邑人懷思舊德錄其生平事蹟請於朝同治十二年十二月二十一日奉旨崇祀鄉賢祠

譚敬昭字子晉一字康侯號選樓元陽子聰穎絕倫四齡從嫡母李氏受經八齡己能屬文十齡以崆峒賊及詩見賞於蔣涑莊邑侯如

卷十

一三三

皋姜巢雲先生十二齡補邑弟子員前後郡試凡十四冠軍曹習庵戴蓮士萬和圃姚秋農各學使皆以偉器目之嘉慶丁卯舉於鄉會試報罷充武英殿校對官越十年成進士授戶部主事在部供職非公事不謁上官公餘退食輒手一卷蕭然自得于人世浮榮泊如也卒于京邸幼年隨父司訓樂昌著有趨庭聞韶兩集晚著有聽雲樓詩鈔詞鈔行世遠近購誦焉沒後番禺張維屏銘其墓曰其官弗遷其年弗延其人則傳其形歸於幽阡其神游於閭風之巔而比肩乎列仙

按敬昭淹博羣藉尤深於詩近人所著詩話詩集詞鈔推崇備至採錄以表揚之順德黎簡以詩名海內敬昭賦鵬鶴篇投之簡答詩有云鵬則吾不能鶴則與君相軒輕其為先輩傾倒如此

(見粵東)

三子詩題詞

簡愛其詩相嘆為異才嘗懸寓齋壁上

(玉壺山房詩話)

五言有

齊梁風致短歌第一解直逼漢魏見香石詩話五律魄力尤為雄渾見

十二石山齋詩話論者以鄺露為南中太白敬昭于露外別樹一幟見楚庭

耆舊遺詩與番禺張維屏輩稱粵東三子見玉壺山房詩鈔維屏稱其詩溯

沿風騷沈浸樂府瀏然以清穆然以古取法于漢魏六朝三唐而

掇其菁華嗣響乎嶺南諸大家而自闢堂奧見維屏所作墓誌又與番禺

段佩蘭輩稱嶺南七子見伊秉綬雲泉題唱記尤深樂府挹取六朝三李之

菁英見粵東三子詩題詞欽州馮太史敏昌招同越秀山登高名流咸集

盛稱昭樂府獨出冠時見玉壺山房詩鈔敬昭尤工文所作擅六朝初唐

之勝顧不自愛惜流傳者鮮如答客難一首七稽一首雜文一卷

吳應逵孝廉嘗刻之譜荔軒筆記見茶村詩話

羅升培字宣琳號次垣大鎬灣人遷居城西品端學粹甫逾冠登鄉

榜再試成進士授浙江常山令蒞任遇旱荒躬諭商富賑濟活飢民

卷十 一四

甚衆呼曰羅青天又捐建定陽書院士民德之建生祠奉祀顏曰惠

媿昌黎歷署石門錢塘縣事兩充鄉闈同考試官遷任玉環烏鎮同

知調甘肅署循化同知涇州知州平涼慶陽府知府政績炳然常從

總督富海帆征西番建策大捷移署四川西陽直隸州計獲匪首梅

昌明等千餘人分別斬釋才名聞於朝以內記名陞用疊署潼州重

慶成都夔州等府旋實授夔州知府任夔時值湖北全省淪於寇升

培恩威並用能得民心鄰寇不敢竄犯年六十九致仕歸辦理邑事

持平不阿時遭狇匪擾亂民艱於食升培出穀接濟之惠及里閭生

平工吟咏著有兀兀集詩鈔子鎮輔廩貢生樂善好施與人交久敬

不衰好讀書蓄古今書籍甚富

劉承軒字鳴庭號霞峯榮玠長子穎悟性成為學悉遵庭訓以廩貢

任石城訓導旋膺順天鄉薦會試挑取國史館謄錄資滿選福建政

和縣知縣甫下車清釐積案二百餘民情洽服以卓異調權閩縣兼福州海防事懾服外夷懲治豪猾大吏倚重焉移權龍巖直州調補龍溪縣題陞廈門同知奉檄抵任撫降海洋劇盜功稱最丁內艱歸遂不起卒年五十三承軒負經濟才行將大用阨於命論者深惜之劉榮琪號崑圃裔灼六代孫幼負神童之譽下筆成文驚倒時輩以諸生肄業越華書院出元和陳太史鍾麟門嘆為東粵雋才隨膺選拔萃科末朝考登鄉榜亞魁連捷成進士授工部主事是科閩廣雲貴貢士對策書法無出琪右為忌者擠抑遂無入翰苑者琪夷然南歸僅一載歿于羊城旅次

吳以受號介石字允文潭水湖邊人沈潛好學耿介自守道光壬辰舉於鄉越十五年大挑一等以知縣分發山東歷任高密即墨掖黃四縣所至有政聲解組歸清風兩袖人稱廉吏晚年授徒東安學行

卷十

二五

為士林推重卒年七十一

莫蒼榮字戟門那烏堡獅子岡人由進士任直隸邯鄲縣遇歲飢詳請開倉賑濟多所全活丁外艱歸值咸豐甲寅之亂邑紳募勇討賊克復縣城蒼榮與有力焉賊首某餽以稅田五百畝乞保其祠厦却不受邑侯贈以廉正可風四字學憲李星元聘閱本省鄉試遺才卷衡文公正不可干以私總督葉名琛委主講香山東安暨本邑書院以復邑城功保舉知州服闋再任邯鄲令擢保安知州調山西吉州知州題陞太原同知政績卓著年六十九卒於官

莫蒼稜字芳山增貢生蒼榮弟咸豐四年以復邑城功保舉知縣歷任四川鹽源縣縣丞巴縣左堂巴為重慶首邑為西藏使人京所取道供應浩繁稜處置裕如兼攝大金川綏靖兩屯軍糧政務鎮撫懷柔蠻俗悅服調修黃河日乘驢巡祖河工二驢斃而督修之志不懈

大吏以其功上諸朝部准陞南川縣以年老辭不就卒於家
吳垣豐邑城人樂善好施精岐黃術鄰有貧病診不索酬且施藥焉
時有一生菩薩是心腸之譽嘉慶末修邑志參與辦事為縣令所倚
重

王俊聲號希文三甲人世業農勤儉成家富逾中人產而嚮學好義
為縉紳所不及時邑紳劉榮玠宦浙寄千金回籍倡設闔邑賓興費
函致邑紳富戶協力捐助多懷觀望俊聲聞而義之捐如其數由是
羣衆踴躍事遂有成其他旱荒潦災無不捐粟賑濟尤尊重士林延
師訓課子弟敬禮有加焉卒年七十一子秀深由湖南州吏目卓異
保舉知縣歷任永興通道會同醴陵綏寧等縣知縣署桂陽知州陞
任茶陵知州調署衡州知府所至有政聲以能吏稱

邱成章字子昭南在堡人生平慷慨好施凡遇年飢出粟以賑鄉里

卷十

二六

貧民有喪葬無貲婚嫁愆期者恒助之不取償通財尚義足以風世
卒年八十五

王俊魁字春三六甲人附貢生道光八年任淮寧寶豐縣丞兼代知
縣廉明慈惠遺愛在民卸任里居遇疑難事輒為鄉族排解遠近德
之

陳訐榮平坦堡魚塘村人少孤貧事母能菽水承歡人稱其孝長經
商致富好行其德號為義商卒年八十八

伍學桐六甲人樂善好施而處事一準於義能於守約中行其博愛
道光六年歲飢出粟施賑鄉里得免餓殍

袁昌樞號景雲三甲人通經史能文章年十四遊於庠九薦鄉闈不
售授徒三十餘年遊其門者多成材後以恩貢生任吳川教諭抱道
自重有廉介名

范昌鑑號鏡川龐洞人增貢生任電白教諭造門請業者無虛日裁成甚衆生平所交多知名士切磋琢磨學益日粹鄉人仰為泰山北斗

張光榮號錦村平坦堡河垠村人好讀書深明大義善事父母父患足疾數年不能坐立光勞親煎湯藥晨昏侍奉翼坐扶立未嘗諉於妻子終父之身色養弗衰生平最惡道巫易筮時囑其子勿延齋薦顏有莊號南墀青山堡長塘村人篤志好學讀書家塾十餘年除回家定省外未嘗出門一步咸豐辛亥中副車壬子舉於鄉越八年庚申捷南宮以知縣分發浙江逾年辛酉携一子瑞豫赴浙十一月省城陷於寇巡撫以下各官殉難莊聞報回寓穿朝服望北叩謝決志死職有勸以身未受祿可雜人民逃出者莊毅然不顧取筆疾書義不可廢身不可辱城亡與亡雖死猶生數語交其家僕密藏衣袖中

卷十

二七

潛逃入京稟報并命其子瑞豫同逃瑞豫戀父不肯慨然曰父死忠子詎可不死孝乎揮家僕令速行至午刻賊入寓擁莊父子去百般勸降莊神色不動厲聲罵賊突抽短刀手刃賊目一名餘賊怒四面攢刺瑞豫堅抱父身同時殉難後其僕間關抵京報告同鄉官具印結達於朝予卹典蔭雲騎尉世職祀昭忠祠季子瑞豐以邑附生襲蔭

劉承輦字鳴騶號鑾坡榮玠季子出嗣伯父榮玠幼受父兄教學有根柢本經史發為文章負雋才重望性剛毅果斷能任事為孝廉時咸豐甲寅寇陷縣城與兄承翰傾家財募鄉勇奉縣主討賊義旗一舉闔邑雲從為復城功首旋倡議修城丁巳歲飢籌賑甚力鄉民飢而不害同治壬戌捷南宮假旋值髮狇兩匪擾亂全邑晉省乞師勦辦并與邑紳羅升楛設立果毅局籌給軍餉躬赴前敵卒平寇亂復

以亂後糧稅無出乞大吏具奏免糧二年後由刑部主事改捐同知指分江西歷署瑞州府同知廣豐縣知縣解組歸主講瑞雲書院及羅陽書院陽春羅定兩邑人士咸宗仰之倡建試院又建字祖閣為邑人士會友論文之所卒年七十三歿後鄉人以其建築三甲墟圍堡有功德於民即三甲義倉刻主祀之堂姪顯相號少華歲貢生善訓徒成就者衆甲寅討賊之役顯相首倡大義事卒有成

陳守衷號若菴高岡堡羅座村人道光癸卯舉人咸豐四年縣城淪陷徧地皆賊道梗不通守衷集團自守賊不敢近城復後賊復踞黃泥灣與各土匪肆劫為虐守衷間道來城請兵進勦且躬率鄉勇前導遂以次蕩平上游諸寇隨使族人陳贊材督工修城叙功保舉軍民府贊材亦保舉守備同治元年狝匪撲攻縣城守衷復率族人陳安陳炳華守城卻賊生平勇於任事品學亦優卒年六十六子炳霖

卷十

二八

炳霖皆有聲庠序

李樹勳號麟閣平坦堡源河村人邑庠生誠樸篤實君子也處約以道非其義一介不取鄉黨賢之卒年八十餘

張贊犖號卓州三甲中寮人未冠補弟子員以孝友稱於鄉好裁成後進授徒不計脩脯所居鄉路險溪深犖築橋道以濟行人揮財不吝咸同間土寇肆擾率團壯禦賊斬馘無算民賴以安暮年隱居熱水吟詠自娛

劉士鉞號西堂三甲曲岡人性溫厚好讀書而隱於農以勤儉起家既富好施與同族孝廉顯楨為作家傳稱其惇族睦鄰賑災卹貧為晚近來有道長者卒年七十七子榮汭武舉綽有父風

鄒作華號實菴那旦人歲貢生少負志節雖窮約不失其所守排難解紛以俠義稱時值大同軍亂逼鄉民附從後被株連作華躬赴縣

庭代為辯白官直其義多獲省釋及卒鄉里為之罷春

李嶽號崧甫維揚曾孫附貢生卓犖負大志工書法詩文亦排冝有奇氣每慷慨論事鬚眉翕張不可一世咸同間勦匪復城屢出奇策居鄉倡辦平糶歲飢無害又創設岡尾墟市便鄉民交易復建種惠書院於邑城為族中子弟應試宿舍著有崆峒倚劍草堂詩集四卷與劉德瑄同集邑志未刊卒年七十二

敖雍鳴號琴泉邑城人幼聰穎為邑令陶應榮所器重課讀署中造詣益進咸豐辛酉選拔朝考報罷取道河洛江漢洞庭以歸吟詠不輟晚年喜學昌黎長吉涪翁放翁諸家得其神似卒年五十著有浣香齋詩鈔一卷

劉顯楣字采章號次雲榮玠孫性剛鯁而行端方學以古人為期為文有先正矩矱未弱冠蜚聲庠序志氣壯甚咸豐壬子鄉試己取中

卷十

二九

亞魁以三場犯諱字見擯然由是名益噪同郡蘇侍御廷魁器重之生平勇於行義咸同年間鄉里遭匪亂後民多飢斃楣首捐穀百石倡設三甲義倉糶陳易新積儲至千餘石自後雖凶年不災復捐修荆山徑路築舊院洞田陂凡利民之事無不為供職內閣中書卒於京邸年五十五著有詩易經音訓摘鈔兩書行於世

劉德璨號星垣高垠人歲貢生成豐甲寅縣城陷潭水嚮應賊設立大館偽示偽割紛至各鄉非附從即觀望全堡岌岌勢不終日德璨獨能以一書生就高垠一鄉召集族黨誓衆拒賊俟三甲義勇至隨同劉承輦蕩平羣寇恢復縣城叙功獎六品頂戴後以授徒終其身卒年六十二

范建熙號穆堂龐洞人議叙州同事繼母以孝聞且明事理識時務咸豐七年歲荒熙出穀平糶不繼復乞糶鄰邑同治元年西山賊逼

龐洞熙毀家紓難懸重賞募勇士禦賊於古牛鄉堡賴以不陷舉賊堅持半月適劉承輦率三甲勇至協同進剿一鼓蕩平捍患禦災功垂梓里

魯殿顏改名彥光號式南邑城人好學能文尤工書畫同治癸酉選拔朝考一等供職刑部七品小京官旋改外授山西天鎮縣知縣歷署太谷大同鳳臺等縣皆久於其任撫字有方催科不擾所去民咸思之晚署平遙縣卒於官

劉德瑄字子韶號小夔高垠人同治甲子舉人善屬文兼工詩賦博通經史百家主講瑞雲書院十載己丑部選司訓任三水教諭年六十五卒于任生平至性純篤事母克盡子職昆弟間友愛無間好施與而自矢廉潔在鄉在官不渝其素光緒十三年續修邑志稿成未梓著有射木山房詩集八卷

卷十

三十

劉顯楨字朝章號岐生榮玠孫由廩貢生捐候選府同知旋中式光緒丙子舉人五上春官兩薦不售性沈靜淵默篤於內行未冠失怙事繼母盡道事兄如父自幼至老怡顏下氣恭敬無失人以為難處鄉族中任睦惇叙躬行禮讓克紹乃祖家風邑中印金及宗祠義學悉楨倡設又倡修文廟教授生徒數十年因材施教無不琢磨成器晚年主講瑞雲書院尤為士林推重卒年六十四

劉士疇號錫九鳳北堡人長失怙事母能承顏順志析居時母偏愛少子田地擇取其沃者子疇以瘠疇順受之怡然也疇善權子母數年後家日豐諸弟不事生產饗殮或不給疇復與諸弟同居合爨洵為人所難能

曾超賢號沂泉西河塘底堡人居家無遺行見義勇為時西河迭遭鄰寇及狇匪之亂傾家募勇拒賊守堡一鄉賴以保全復倡賑飢荒

創造橋梁慈善可紀

曾傳甲號樸石西河堡人增貢生儘先候補訓導供職戶部員外郎福建司兼湖廣司行走為人廉潔篤實以道義自重邑中創設印金文社皆與有勞焉

李泮字象芹號碧香高岡堡白高村人歲貢生性聰慧家無儲蓄食貧力學鬻田以奉脩脯卒能名成行立居鄉以廉介自持且溫厚謙和無疾言無遽色望而知為有道長者梓里有爭訟者得泮一言立解咸同間贊助勦匪勤勞備至光緒時地方多故辦理合水局務一秉大公卒年七十孫英元拔貢生

陳存元號初吉七甲人恩貢生家貧嗜學文譽早著居恆藉館穀以贍家遠近聞名其者爭延教授於其鄉茂名電白信宜東安多其門弟子生平品端行謹不愧士林中人

卷十

三一

林德驥號玉泉附貢生南在堡震龍村人好山水工書畫廉潔和平鄉人信仰倡建合水滙瀾義學以作育人材著有梅鶴集遺稿卒年七十三

崔振壘號鷺田平坦堡蓮塘村人附貢生光緒十八年陽江賊譚運清糾黨出泉水圖攻縣城振壘率鄉勇擊退之獎六品頂戴充本堡保正四十餘年

以上錄採訪冊

耆壽

舊志列選舉鄉飲內似屬不倫今另編此

葉南魁九十一歲

李賢秀八十五歲

以上均康熙九年奉恩詔給賜粟帛

陳日全一百一歲家潭西石累世務農愿樸安分

梁挺一百歲家西門外第擢街恩賜八品瀟洒不羈雅嗜浮屠家言實能外形體以理自勝而不為紛華侵擾者

陳朝隆西河人年九十一恩賜八品夫婦齊眉子孫曾元多至七十餘人天倫之盛實為罕觀

譚洪躍八十八歲城西洗馬街人邑庠生敦厚恂謹子予芳登賢書洪躍愈謙恭鄉黨間羣稱長者

謝萬祥年九十六歲順陽都平結村人英德教諭謝惠成之祖也忠厚樸直耄年猶手不持杖日行百餘里矍鑠異常妻黃氏九旬偕老健亦如之

彭志傑石棗人年一百二歲

以上錄舊志

韋德年一百六歲那旦堡人謹愿誠實精神强健

卷十

三十一

韋肇東年一百五歲那旦堡人親見七代同堂以期頤上壽七代同堂請旌賜額曰昇平人瑞七葉衍祥

易象護年一百四歲黃泥灣后背巷人

吳德芳年一百一歲七甲馬跳村人奉旨旌表賜以恩榮百歲坊額林士璋年一百歲高岡堡梘頭村人妻梁氏年亦百歲夫妻偕老恩

賜七品

陳達勝年一百歲雙溶堡人恩貢生陳存元之父也手不扶杖矍鑠異常子孫衆多親見五代同堂旨賜建坊額曰昇平人瑞恩賞八品職銜妻蘇氏年亦九十餘與偕老焉

劉世壽原名世上年一百歲三甲土雞坑村人宗族鄉黨聯呈請旌未及恩獎而卒

鍾開廣年九十三歲雲霖堡發財逕人恩賜七品生平淡泊明志事

母以孝聞五代同堂孫曾數十人

范昌運號際華年九十三歲龐洞人欽賜副貢疊賜舉人居家孝友
通經史工書法為鄉黨五十年良教授

袁昌校年九十二歲三甲人候選縣丞恩賜七葉衍祥四字夫婦齊
眉子孫蕃衍親見五代同堂

黃寶瑰年九十二歲八甲人恩賜八品妻廖氏亦年近九旬花燭重
逢為一時盛事

植惠元年九十一歲雲霖堡人恩賞七品親見五代同堂

范昌淇年九十歲龐洞人處約以道力學能文

羅維榮年九十歲那旦堡人親見五代同堂子孫昌熾七遊文庠

韋盈進年八十九歲那旦堡黃菴村人性樸直篤厚妻劉氏年九十

九歲親見五代同堂

卷十

黃協達年八十九歲親見五代同堂精力至老不衰子孫蕃衍

以上錄採訪冊